

Cuira, ils 11 da schaner 2012

Communicaziun a las medias

Champ rumantsch per famiglias

(LR) La Lia Rumantscha organisescha er questa stad puspè in champ per famiglias rumantschas/bilinguas da la diaspora, pia d'ordaifer il territori da tschep rumantsch. Ils geniturs e lur uffants duain avair la pussaivladad da "far in bogn" en la lingua e cultura rumantscha e d'intensivar lur abilitads linguisticas rumantschas en in champ en buna cumpagnia.

La Lia Rumantscha ha la finamira da rinforzar las cundiziuns da basa per promover il rumantsch. Plinavant vul ella era promover l'integraziun linguistica e sociala da persunas da lingua betg rumantscha. Questa finamira integrativa vala per persunas ch'abiteschan ordaifer il territori rumantsch.

Per quest motiv organisescha la Lia Rumantscha questa stad danovamain in champ polivalent per famiglias rumantschas e bilinguas che abiteschan en la diaspora. Il champ ha lieu dals 23 als 27 da fanadur/lügl 2012 a Maton/Muntogna da Schons.

Il champ vul porscher ad uffants da mintga vegliadetgna e lur geniturs in vast program per ch'els possian intensivar lur abilitads linguisticas rumantschas. L'ambient rumantsch duai animar ils uffants e lur geniturs da sa sentir puspè meglier da chasa en la lingua rumantscha. Quai po capitar a moda fitg multifara cun far excursiuns en il conturn, far sport, chantar, zambregiar, tadlar paraulas e bler auter.

La lingua dal champ è rumantsch. Autras linguas discurridas vegnan integradas a moda ludica en las differentas activitads. Ina istorgia rumantscha accumpogna las famiglias tras l'emna e dat ils impuls per las differentas activitads dal champ.

La tgira dals uffants è garantida. Ils geniturs pon sa participar cun ils uffants e parzialmain era mo tranter creschids a las differentas purschidas multifaras. Cun ina cuschina variada ed in accumpagnament pedagogic professiunal vegn procurà per il bainstar da las famiglias.

Custs: CHF 250.- / persuna (pretsch reduci per uffants fin 6 onns).

Ulteriuras infurmaziuns ed annunzias fin ils 29 da favrer 2012:

Lia Rumantscha, Annalisa Schaniel, Via da la Plessur 47, Chascha postala, 7001 Cuira, tel. +41 (0)81 258 32 22, www.liarumantscha.ch

Contact per las medias:

Andreas Gabriel
mob. +41 (0)79 650 83 89
andreas.gabriel@rumantsch.ch